

Zahoritosć za sejm njepřeskočila

Někotryžkuli wćipny wobydler Radworja bě wćera na posedźenje gmejnskeje rady přišoł, zo by předstajenje iniciatiwneje skupiny Serbski sejm dožiwił. Na kóncu běchu wšitcy we wólbnobojowym zarjadowanju, kotrež dyrbyeše wjesnjanosta po hodźinje přetorhnyć.

Radwor (SN/MkWj). Hnydom pjeć zastupnikow iniciatiwneje skupiny bě wćera wječor na posedźenje gmejnskeje rady do Radworja přišo, zo bychy swoje dźeło a swoje předstawy na jednym z dźesać dypkow dnjoweho porjada rozložili.

W swojim zahajacym referaće rysowaše dr. Měrcin Wałda z Njeswačidla hlada jo na tuchwilne položenje Serbow dosć struchły wobraz: Serbska substanca so pozhubja, ludej pobrachuja wučerjo, duchowni a politikarjo, kriza so dale přiwótřa. Hdyž so ničo njezměni, su Serbja za dźesać do pjatnaće lět „preč“, bě sej wón wěsty. Serbja njejsu wužadanjem časa zrosćeni, nimaja žanu strategiju a žadyn koncept. Domowina je po słowach dr. Wałdy bjezmóčna. Wona njemóžeše zawrjenju serbskich šulow zadžěwać. Jeho facit: „Jenož demokratiske zastupnistwo Serbow móže to změnić. Tajku šansu hišće nihdy njemějachmy.“

Dr. Měrcin Krawc rozloži proceduru wólbow: Kóždy móže so jako woler do lisćiny zapisać dać, na čož dóstanje list z lisćinu kandidatow, kotruž nakřížikowanu zaso wotpóscele. Wólby su plaćiwé, su-li znajmjeńša tři swój hlós wotedali.

Gmejnsy radźicieljo kaž tež hosćo njemóžachu so zahoritosći iniciatiwnikow přizamknyć. Pětr Kliman bě sej runje tak kaž Šćěpan Dej wěsty, zo je ze sejmikom dalše šćěpjenje serbskeho ludu wotwidzomne a zo dyrbjał sejm z Domowinu zhromadnje postupować. To pak sejmownicy kaž dr. Andreas Kluge wotpokazachu, wumjetujo třěsnemu zwjazkej, zo njeje k dialogej zwólniwy.

Roman Dźisławk z Chasowa so na prašenju postorkowaše, što smě poprawom Serbski sejm wolić. Zo smě to faktisce kóždy wobydler Němskeje činić, kiž je 18. žiwjenske lěto docpěl, měješe wón za „přinarodženy brach“ sejma.

Po hodžinu trajacej zdžěla emocionalnej debaće so wjesnjanosće Wincencej Baberšce (CDU) kornar pukny. Skedźbnjejo na to, zo maja gmejnsy radźicieljo hišće wobšěrny dnjowy porjad před sobu, wón „předstajenje“ iniciatiwneje skupiny přetorhny, namjetujo, debatu na druhim městnje dale wjesć.